



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-I/25-3-40-544-4/21**
Datum: **22.12.2021. god.**

„Agencija za vodno područje rijeke Save“ Sarajevo rješavajući po zahtjevu pravnog lica „IZGRADNJA“ d.o.o. Teočak, za donošenje rješenja o vodnoj dozvoli za ispuštanje oborinskih onečišćenih otpadnih voda (tehnoloških otpadnih voda) u prirodni recipijent sa lokacije pogona za proizvodnju asfalta izgrađene u naselju Pukiš, Općina Čelić, na osnovu člana 139. stav (1) tačka 3. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi

R J E Š E N J E **o vodnoj dozvoli**

1. Pravnom licu „IZGRADNJA“ d.o.o. Teočak daje se vodna dozvola za ispuštanje oborinskih onečišćenih otpadnih voda (tehnoloških otpadnih voda) u prirodni recipijent sa lokacije pogona za proizvodnju asfalta firme „IZGRADNJA“ d.o.o. Teočak, izgrađene na zemljištu označenom kao k.č. broj 1376/2 K.O. Čelić, u naselju Pukiš, Općina Čelić.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola od strane drugih nadležnih organa, a sve u skladu sa važećim zakonskim propisima, uredbama i dr.
3. Vodna dozvola se daje na osnovu činjeničnog stanja utvrđenog pregledom dostavljene tehničke i druge dokumentacije, izvršenog uviđaja na lokaciji objekta i priloženim dinamičkim planom i pod slijedećim uslovima:
 - 3.1. Da se do 30.06.2022. godine izradi projekat izvedenog stanja objekata za odvodnju i tretman otpadnih voda. Projekat treba da obuhvati prikaz interne kanalizacione mreže — tehnološka i oborinska onečišćena voda sa svim pripadajućim objektima (šahтови, slivnici, podzemni kanalizacioni vodovi i dr.) i to od mjesta nastanka do mjesta ispusta. Projekat treba da obuhvati i prijedlog izgradnje trenutno nedovršenog taložnika/separatora ulja i masti za prečišćavanje oborinskih onečišćenih voda iz objekta za skladištenje mazuta i bitumena, kao i oborinskih onečišćenih voda sa asfaltnih površina, manipulativnog i parking prostora. Projektom je potrebno predvidjeti izgradnju monitoring okna za uzimanje uzoraka. Projektna dokumentacija treba da obuhvati i proračun prihvatnog kapaciteta postojeće betonske tankvane.
 - 3.2. Da se do 31.07.2023 godine završe radovi na izgradnji sistema za prikupljanje, tretman i ispuštanje oborinskih onečišćenih voda (tehnoloških otpadnih voda) u prirodni recipijent.
 - 3.3. Ukoliko se projektnom dokumentacijom ustanovi da prihvatni kapacitet postojeće betonske tankvane nije dovoljan, radove na proširenju završiti do 30.09.2023. godine.
 - 3.4. Da se upotreba i korištenje predmetnog objekta vrši u skladu sa urađenom investiciono tehničkom dokumentacijom, koja je služila kao podloga za davanje ove vodne dozvole.
 - 3.5. Korisnik poslovnog objekta za sve vrijeme trajanja ove vodne dozvole, mora obezbjediti da se oborinske onečišćene vode sa saobraćajnih i manipulativnih površina zajedno sa tehnološkim otpadnim vodama nastalim u krugu pogona za proizvodnju asfalta (deponije pijeska) nesmetano prikupljaju sistemom slivnih rešetki i kanalizacione mreže te odvedu do uređaja za prečišćavanje onečišćenih voda (taložnik, tipski separatora ulja i naftnih derivata), a zatim preko okna za monitoring odvedu do najbližeg recipijenta (otvoreni vodotok ili upojni bunar).
 - 3.6. Da se skladištenje mazuta, energenta za zagrijavanje bitumena, vrši u nadzemnim čeličnim spremnicima, kapaciteta 2x20 t, smještenim u armiranobetonskoj tankvani adekvatne zapremine.
 - 3.7. Da se skladištenje bitumena, vezivnog sredstva u proizvodnji asfalta, vrši u nadzemnim čeličnim spremnicima, kapaciteta 2x15 t, koji su smješteni u armiranobetonskoj tankvani adekvatne zapremine.

- 3.8. Da se poduzmu sve potrebne mjere kojima bi se obezbijedilo da prečišćene otpadne vode, prije ispuštanja u recipijent, zadovolje granične vrijednosti emisije definisane u tabeli 1.1. kolona (3) Priloga 1. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20).
- 3.9. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 19. i 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
- 3.10. Korisnik poslovnog objekta je obavezan da izgrađene objekte, a čija svrha je odvođenje i prečišćavanje onečišćenih voda, redovno održava i koristi na način koji će obezbijediti njihovu potpunu ispravnost i funkcionalnost, kako bi se zadovoljio propisani kvalitet efluenta. Čišćenje i pražnjenje uređaja za tretman otpadnih voda, odnosno separatora ulja i masti može vršiti isključivo firma ovlaštena za tu vrstu djelatnosti, prema posebnom ugovoru.
- 3.11. Korisnik je obavezan da redovno vodi dnevnik o pražnjenju i odvozu sadržaja taložnika i separatora ulja i masti, izdvojenim naftnim derivatima i talogu iz taložnika i separatora ulja i masti
- 3.12. Sadržaj (mulj) iz uređaja za prečišćavanje otpadnih voda i ostali otpad ne smije se odlagati na česticu «vodno dobro», odnosno u vodotoke i na njegove obale.
- 3.13. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
- 3.14. Osigurati priručna sredstva za brzu intervenciju u slučaju nekontrolisanog rasipanja opasnog otpada i isticanja naftnih derivata, kako bi se spriječilo moguće onečišćenje voda i tla.
- 3.15. Investitor je obavezan pridržavati se svih mjera i uslova propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07 - 03/16), Prilog 1., Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove vodne dozvole, Investitor, odnosno korisnik objekta „IZGRADNJA“ d.o.o. Teočak je dužan provoditi sve mjere i aktivnosti propisane istom.
6. Ukoliko radom predmetnog objekta dođe do promjene režima površinskih ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.

8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu obuhvaćenom ovom vodnom dozvolom, korisnik zaštitnih vodnih objekata nije odgovoran za nastale štete.
9. Ova vodna dozvola, shodno članu 117. stav (1) Zakona o vodama i članu 26 stav (1) Uredbe o uslovima ispuštanja otpadnih voda u okoliš i sisteme javne kanalizacije, se daje sa rokom važenja do 19.12.2023. godine.
10. Prije isteka važnosti ove dozvole, Investitor, odnosno korisnik objekta je dužan da podnese zahtjev za izdavanje nove vodne dozvole.
11. Uslov za izdavanje nove vodne dozvole je ispunjenje uslova iz dispozitiva ovog Rješenja.

O b r a z l o ž e n j e

Investitor „IZGRADNJA“ d.o.o. Teočak, obratio se ovoj Agenciji sa zahtjevom za ispuštanje oborinskih onečišćenih otpadnih voda (tehnoloških otpadnih voda) u prirodni recipijent sa lokacije pogona za proizvodnju asfalta firme „IZGRADNJA“ d.o.o. Teočak, izgrađenog na zemljištu označenom kao k.č. broj 1376/2 K.O. Čelić, u naselju Pukiš, Općina Čelić.

U provedenom postupku, uz zahtjev za donošenje rješenja o vodnoj dozvoli, dostavljena je i pregledana slijedeća dokumentacija:

- Ovjerena kopija rješenja o izmjenama podataka u sudski registar, kod subjekta upisa «IZGRADNJA» d.o.o. Teočak, broj: 032-0-Reg-20-000252 od 20.02.2020. godine izdatog od strane Općinskog suda u Tuzli;
- Ovjerena kopija uvjerenja o poreznoj registraciji za «IZGRADNJA» d.o.o. Teočak od 28.02.2020. godine izdatog od strane Porezne uprave Kantonalni porezni ured Tuzla;
- Ovjerena kopija uvjerenja o registraciji/upisu u Jedinostveni registar obveznika indirektnih poreza za «IZGRADNJA» d.o.o. Teočak, broj: 04/1-UPJR/1-1182-2/08 od 03.03.2008. godine izdato od strane Uprava za indirektno-neizravno oporezivanje Banja Luka;
- Kopija rješenja o odobrenju za građenje asfaltne baze na zemljištu označenom kao k.č. broj 1376/2 K.O. Čelić, u naselju Pukiš, Općina Čelić, izdatog od strane Ministarstva prostornog uređenja i zaštite okolice Tuzlanskog Kantona broj: 12-04/23-6155/07 od 12.11.2007. godine;
- Kopija Rješenja o upotrebnoj dozvoli za objekat asfaltne baze, izdatog Ministarstva prostornog uređenja i zaštite okolice Tuzlanskog Kantona broj: 12-04/1-23-9323/10 od 24.11.2010. godine;
- Kopija Rješenja o okolinskoj dozvoli donešenog od strane Ministarstva prostornog uređenja i zaštite okolice Tuzlanskog Kantona, broj: 12/01-1-23-39794 od 05.03.2012. godine;
- Kopija notarske obrade Ugovora o prodaji nekretnine sklopljenog između prodavatelja „ZEJČIROVIĆ“ d.o.o. Čelić i kupca „IZGRADNJA“ d.o.o. Teočak sklopljenog 30.11.2010. godine;
- Kopija rješenja vodne dozvole izdata od strane Agencije za vodno područje rijeke Save, broj: UP-I/25-3-40-590-6/16 od 06.12.2016. godine;
- Izvještaja o monitoringu kvaliteta i kvantiteta otpadnih voda asfaltne baze «IZGRADNJA» urađen od strane „Inspekt – RGH“ d.o.o. Sarajevo, april 2020. godine;
- Izvještaja o monitoringu kvaliteta i kvantiteta otpadnih voda asfaltne baze «IZGRADNJA» urađen od strane „Inspekt – RGH“ d.o.o. Sarajevo, maj 2018. godine;
- Izvještaja o monitoringu kvaliteta i kvantiteta otpadnih voda asfaltne baze «IZGRADNJA» urađen od strane „Inspekt – RGH“ d.o.o. Sarajevo, maj 2021. godine;
- Glavni arhitektonsko građevinski projekat asfaltne baze „ZEJČIROVIĆ“ d.o.o. Čelić, urađen od strane «ZIB-PROJEKT» d.o.o. Brčko Distrikt BiH, maj 2006. godine (na uvid);
- Dokaz o uplaćenju upravnoj pristojbi i administrativnoj taksi

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“ broj 31/15,

55/19 i 41/20), ovaj organ je pokrenuo upravni postupak, te je dana 01.12.2021. godine izvršen pregled objekata, o čemu je sačinjen Zapisnik o uviđaju broj: UP-I/25-3-40-544-2/21.

Na osnovu dostavljene dokumentacije i izvršenog uviđaju na predmetnoj lokaciji utvrđeno je slijedeće: Asfaltna baza se sastoji od slijedećih cjelina: silosa sa smještaj kamenog agregata po frakcijama, postrojenje za transport frakcija agregata, pogon za proizvodnju asfalta, rezervoari 2x15 t za smještaj bitumena, rezervoari za smještaj mazuta 2x20 t., vaga, radni platoi, portirница, interna saobraćajnica. Glavna tehnološka cjelina je pogon za proizvodnju asfalta. Tehnološki proces se odvija automatizovano, prema zadatoj recepturi, vaga, dozira i miješa sirovinu – bitumen, kameni agregat, filter agregat. Separirani kameni agregat se putem transportnih traka dovodi do postrojenja. U procesu spravljanja asfalta ne koristi se voda, niti u procesu proizvodnje nastaju tehnološke otpadne vode. Na predmetnoj lokaciji se javljaju oborinske onečišćene vode koje se dijelom prikupljaju putem izgrađenih slivnika, a dijelom slobodno otiču (manipulativni prostor je nasut šljunkom, nije asfaltiran). Internim kanalizacionim kolektorom se prikupljene vode odvođe do betonskog trokomornog taložnika-separatora ulja i naftnih derivata, čiji preljev otiče na okolni teren.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, člana 12. i 13. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačka s) Uredbe o uslovima ispuštanja otpadnih voda u okoliš i sisteme javne kanalizacije.

Tačkom 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada i Odlukom o visini posebnih vodnih naknada („Službene novine Federacije BiH“, broj 46/07).

Podnosilac zahtjeva je uplatio i posebne troškove shodno Zaključku ove Agencije, broj: UP-I/25-3-40-266-3/21 od 08.07.2021.

Podnosilac zahtjeva je uplatio upravnu i administrativnu taksu u iznosu od 70 u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10 i 43/13)

Na osnovu provedenog postupka konstatuje se da je podnosilac zahtjeva ispunio minimum uslova za izdavanje vodne dozvole za ispuštanje oborinskih onečišćenih otpadnih voda, te je riješeno kao u dispozitivu ovog Rješenja.

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Voditelj postupka: Meho Čaušević, Bsc.ing.građ.

Po ovlaštenju
Rukovodilac sektora za izdavanje vodnih akata


Haris Ališehović, dipl.ing.građ.

Dostaviti:

- „IZGRADNJA“ d.o.o. Teočak, Teočak bb, 75414 Teočak
- AVP Sava, ISV – Vodna knjiga
- Sektor 50
- Sektor 40, arhiva
- Oglasna ploča AVP Sava